

ВАШ АНГЕЛ-ХРАНИТЕЛЬ



МОЛИТВЫ  
НА СВЯТЫЕ  
ПРАЗДНИКИ

# Виктория Шевченко

## Молитвы на святые праздники

### Серия «Ваш ангел-хранитель»

*Текст предоставлен правообладателем*

*[http://www.litres.ru/pages/biblio\\_book/?art=6735289](http://www.litres.ru/pages/biblio_book/?art=6735289)*

*Молитвы на святые праздники – : , . : АСТ, Книжкин Дом; Москва; 2014*

#### **Аннотация**

Молитва – это общение человека с Богом, с миром невидимым-духовным. По нашим молитвам обретаем мы душевный покой, с Божией помощью преодолеваем невзгоды, скорби, болезни. В будни и праздники молитва успокоит мысли для верного выбора, облегчит душу, станет путеводной нитью к жизни праведной, достойной, примерной для других. От молитвы великая польза. Нужно только верить и молиться искренне, с чистым сердцем. Усердная молитва к Богу, Божией Матери, святым не останется без ответа. Пусть она будет вашим постоянным спутником в жизни. В книгу вошли акафисты, посвященные двенадцатым церковным праздникам (переходящим и непереходящим) в порядке церковного года.

# Содержание

Акафисты двенадесятым праздникам	4
Акафист Рождеству Пресвятой Богородицы	4
Акафист Честному и Животворящему Кресту Господню	20
Конец ознакомительного фрагмента.	29

# **Молитвы на святые праздники**

## **Акафисты двенадцатым праздникам**

### **Акафист Рождеству Пресвятой Богородицы (21 сентября)**

#### **Кондак 1-й**

Избранней от человеческого рода и рождшейся от неплодове, Пречистой Деве Марии составим похвалу, яко Рождеством Ея начало спасения нашего бысть и пришествие в мир Избавителя возвестися. Темже радостно Ей возопиим: Радуйся, Пречистая Дево, Материю Спасителя мира от века предызбранная.

## Икос 1-й

Ангел небесный предстояй пред Богом, послан бысть к праведным Иоакиму и Анне возвестити им радость велию, яко по неплодствии своем имут родити Дщерь Преблагословенную, от Неяже всему миру радость произыдет. Темже и мы, радости сея причастницы, похвальная песни Деве воспоем: Радуйся, в Троичном Совете Материю Сына Божия от века предъизбранная; радуйся, древними пророками с патриархи многообразне в образех и сенех прообразованная. Радуйся, вящщие пяти тысяч лет от создания мира рабы Божиими, яко Мать Избавителя,жданная; радуйся, в видении Иакову лествицы, яко Божие к человеку снизшествие, предуказанная. Радуйся, неопалимою купиною в пустыни Синайстей Моисеом виденною, предвозвещенная; радуйся, Чермным морем Израилю сух путь давшему, фараона же потопившему, образне преднаписанная. Радуйся, написатися нам в книзе Живота Вечнаго пособствующая; радуйся, Царствия Небеснаго невозбранный вход нам ходатайствующая. Радуйся, Пречистая Дево, Материю Спасителя мира от века предъизбранная.

## **Кондак 2-й**

Видяще праведнии Иоаким и Анна явльшагося им Ангела, возвещающа Рождество Твое, Пресвятая Дево, возблагодариша Бога, призревшаго отъяти поношение безчадия их, и всем сердцем тепле возопиша: Аллилуиа.

## **Икос 2-й**

Разум Божественнаго строительства и на землю низшествия Своего Всеблагий Господь исполнити начиная, посланием Ангела Своего возвестити Иоакиму и Анне о Рождестве Твоем, Пресвятая Дево. Темже вопием Ти хвалебно: Радуйся, разума Божественнаго проявление; радуйся, дивнаго смотрения Его исполнение. Радуйся, древле предуставленная послужити воплощению Сына Божия; радуйся, от всех родов в жилище всех Царя избранная. Радуйся, еще в раи изречением искустителю змию о положении вражды между тем и Женою и Семенем Ея преуказанная; радуйся, по исполнении времен от неплодове изволением Божиим славно произшедшая. Радуйся, род человеческий Рождеством Своим возвеселившая; радуйся, сетование чаявших утехи Израилевы на радость преложившая. Радуйся, Пречистая Дево, Материю Спасителя мира от века предъизбранная.

## **Кондак 3-й**

Сила Вышняго разреши неплодство заматоревшия во днех своих праведныя Анны: зачат бо Тя, Пречистая, и, чая Твоего рождения, радостно пояше Богу Израилеву хвалебную песнь: Аллилуиа.

## **Икос 3-й**

Имущая безмужно родити Спасителя душ и телес наших, Ты и Сама, яко чудо пред велиим и непостижимым чудесем, от неплодных родителей славно родися, Пресвятая Дево. Темже воспеваем Ти сице: Радуйся, от корене Иессеова и Давидова произшедшая; радуйся, от неплодных ложесн праведныя Анны дивно прозябшая. Радуйся, пророчеством Исаии прежде лет древних Дева-Матерь явленная; радуйся, по обетованию Ангела рожденная. Радуйся, скинию свидения и Ковчегом завета прообразованная; радуйся, процветшим жезлом Аароновым образне предзнаменованная. Радуйся, прежде Рождества Твоего в Матерь Богу Слову освященная и предуготованная. Радуйся, Пречистая Дево, Материю Спасителя мира от века предъизбранная.

## Кондак 4-й

Бури поношений человеческих о неплодствии своем избавльшися в зачатии Твоем, Пресвятая Дево, праведнии родители Твои радовахуся, и в честь Рождества Твоего учреждение велие творяху сродником и знаемым, и тии срадовахуся им, вопиюща Богу, сотворшему милость Свою, хвалебную песнь: Аллилуиа.

## Икос 4-й

Слышавше окрестные людие, яко дщи Иоакима и Анны наречена бысть Мария, сиесть Госпожа, разумеваху, Пречистая, велику и славну Тя быти не токмо в людех, но и у Бога. Мы же, сбытие сего добре ведуще, величаем Тя сице: Радуйся, Пресвятая Дево, не от человека, но от Ангела имя Себе еще прежде зачатия приявшая; радуйся, по имени сему Госпожею всея твари быти сподобльшася. Радуйся, яко праведнии родители Твои воздающе Богу благодарение за Рождение Твое, великия дары в жертву Тому принесоша; радуйся, яко сродником и знаемым, купно же и убогим вечерю любви сотвориша. Радуйся, яко от священников, в дом родителей Твоих на торжество званных, благословенна еси; радуйся, яко от всех на веселие оно собравшихся, похвалена и про-

славлена была еси. Радуйся, выше всякия чести и похвалы явльшаяся; радуйся, Материю Бога Слова быти сподобльшаяся. Радуйся, Пречистая Дево, Материю Спасителя мира от века предъизбранная.

## **Кондак 5-й**

Боготечная звезда, возвещающая пришествие Солнца Правды, Христа Бога нашего, в Рождестве Твоем явися, о Пресвятая Дево; темже людие Божии, пришествия Избавителя верою чаявшии, видяще Тя чудно от неплодове рождшюся, таинственно возвеселишася и возопиша: Аллилуиа.

## **Икос 5-й**

Видевши праведнии Иоаким и Анна рождшюся от них Богоотроковицу Марию, о Нейже Ангел Божий некая чудная и дивная тем провозвести, яко Кивоту Божию, Той послужиша, питающе и храняще Ю, якоже зеницу ока. Темже и мы похваляюще Богоотцев, сподобившихся родителями быти таковыя Дщери, Деве Марии радостно воспеваем: Радуйся, Пречистая Дево, яко по Рождестве Твоем родители Твои вельми возликоваху; радуйся, яко в явлении Твоем в мир Ангели и человецы согласно возрадовахуся. Радуйся, яко о Тебе вси пророцы многообразне предглаголаху; радуйся, яко

един от них Вратами затворенными, ин же Горою приосе-  
ненною Тя именовашу. Радуйся, яко вся преславная древле  
таинственно о Тебе предлаголано быша; радуйся, яко гра-  
дом и селением Божиим псаломская уста Тя наименоваша.  
Радуйся, седмосвещным светильником, яко седмию дарами  
Святаго Духа исполненная; радуйся, позлащенною трапезою  
с хлебами предложения, яко Хлеб Жизни, Христа, родити  
имевшая. Радуйся, Пречистая Дево, Материю Спасителя ми-  
ра от века предъизбранная.

### **Кондак 6-й**

Проповедник богоносных вещания и глаголы исполняяй,  
изволением Зиждителя твари на земли явилася еси, Пресвя-  
тая Дево, естества нашего цвете, Адама же и Евы воззвание и  
на первую доброту возведение. Темже вси вернии в Рожде-  
стве Твоем радость обретши, духовне торжествуем, дивному  
в Совете Своем Богу поюще: Аллилуиа.

### **Икос 6-й**

Возсия в Рождестве Твоем, Пречистая, заря спасения на-  
шего, во исполнение Божественнаго Смотрения, имже Ты  
едина еси от всех родов достойна явилася плоть заимодати  
Зиждителю Твоему, пришедшему спасти род наш от древния

праотеческия клятвы. Сего ради взываем Ти сице: Радуйся, Адама и Евы воззвание; радуйся, древния клятвы разреше-ние. Радуйся, сеновнаго закона конец и новыя благодати на-чало; радуйся, промышленности Божественнаго Таинница. Ра-дуйся, едина Материю Бога Слова быти достойна обретшая-ся; радуйся, и нам новым во Христе людем Мати явльшаяся. Радуйся, Матерним Твоим попечением николиже нас остав-ляющая; радуйся, в чада Сыну Твоему благоугодны нас при-готовляющая. Радуйся, Пречистая Дево, Материю Спасите-ля мира от века предызбранная.

### **Кондак 7-й**

Хотяще обеты своя Господеви воздати, праведнии родите-лие Твоя, Пресвятая Дево, трилетствующую Тя отроковицу приведоша в храм Господень со славою и радостию многою. Первосвященник же Захария, Духом Божиим объятый, вве-де Тя во Святая Святых, яже быша прообразом Твоя Свя-тыни: Ты бо вместила еси в Себе святых Святейшаго Сына Божия. Емуже с лики девическими воспевала еси: Аллилуиа.

### **Икос 7-й**

Новое и преславное Промышление Божественное бысть о Тебе, Дево, яко в храме Божии пищу от рук Ангельских

принимала еси, Пресвятая. Темже молим Тя: напитай нас пищею благодатною, да возрастем духовно и Тебе, Всецарице, похвальная возопием: Радуйся, преукрашенная добродетельми, Отроковице, в храме Божии жити и Ангелом Собеседницей быти сподобльшаяся; радуйся, от Ангелов пищу небесную во Святая Святых приявшая. Радуйся, во храме Божественным хлебом чудесно напитанная; радуйся, к великому таинству воплощения Сына Божия тамо предуготованная. Радуйся, яко повелением Божиим Ангели на земли Тебе усердно служаху; радуйся, яко тии на небесех ныне Тебе яко Царице благоговейно пояху. Радуйся, яко и мы недостойнии песньми хвалебными присно Тя величаем; радуйся, яко и рождших Тя Богоотцев всегда ублажаем. Радуйся, Пречистая Дево, Материю Спасителя мира от века предызбранная.

## **Кондак 8-й**

Странное Рождество Пречистыя Девы видевше, устранимся суетнаго мира, ум на небеса преложше, идеже Богоматерь во славе предстоит Сыну Своему и Богу, ходатайствующи пред Ним о всех верных, всеславное Рождество Ея любовию празднующих и вопиющих Богу: Аллилуиа.

## Икос 8-й

Вся тварь в Рождестве Твоем, Пречистая, обрете радость, печаль праотеческую потребляющую: произшедшим бо от Тебе Христом Богом, падшее во грех преслушания естество наше от падения воста и паки любезно Зиждителю сотвори-ся. Темже умильно Ти взываем: Радуйся, всемирныя радости предвозвещение; радуйся, таинство от века сокровенна-го явление. Радуйся, Еюже от падения мы возведошася; ра-дуйся, Еюже, прежде отриновенное, естество наше Богу при-несошеся. Радуйся, Еюже Иоаким и Анна поношения безча-дия свободившася; радуйся, Еюже бесплодие сердец наших в благоплодие применишася. Радуйся, Еюже обилие благ веч-ных верным от Господа подается; радуйся, Еюже благодаре-ние Господеву от верных приносится. Радуйся, Пречистая Дево, Материю Спасителя мира от века предызбранная.

## Кондак 9-й

Вси Ангели Божии, не ведяху тайны Божия Воплощения в Триипостасном Совете от века сокровенныя и напоследок Девою Мариєю явленныя, вельми удивляхуся, зряще, како Дщи Иоакима и Анны противу естеству женску, во Святая Святыя введеся. Темже недоумением объяти бывше, благо-

говейно вопияху: Аллилуиа.

## Икос 9-й

Вития древнейший, во царех Израилевых всемудрый Соломон, провидя Рождество Твое, Пречистая, в Песни Песней со удивлением возглашаша: кто Сия, проницающая, аки утро, добра яко луна, избрана яко солнце? Темже Церковь, во празднице Твоем ликовствующи, весело Тебе вопиет: Радуйся, невечерняго дне Богоявления утро светлейшее, в законней сени, яко во мраце, возсиявшее; радуйся, солнцеобразная Дево, истиннаго Солнца Христа девственным воплощением вся просветившая. Радуйся, световидная стихия, существенно приявшая Бога, живущаго во свете неприступнем; радуйся, Своим малым чревом объявшая Безпредельнаго, вся концы вселенныя объемлющаго. Радуйся, полная луно, Свет Божественный восприемлющая и нас тем озаряющая; радуйся, чистейшее зеркало, многая совершенства Божия отображающее. Радуйся, совершенством Твоих нас к добродетелей стяжанию побуждающая; радуйся, немощныя силы наши в творении добрых дел укрепляющая. Радуйся, Пречистая Дево, Материю Спасителя мира от века предъизбранная.

## Кондак 10-й

Спасти хотя род человеческий от первородных клятвы, дивное Смотрения Своего таинство сотвори Господь: избра бо Тя, Пречистая, от рода Авраамля и Давидова, и от Тебе безсеменно воплотится благоизволи, уставы естества побеждая. Темже Рождество Твое днесь празднующи и рождавших Тя восхваляюще, вопием Богу: Аллилуиа.

## Икос 10-й

Царь Небесный, спасения нашего ради, хотя на земли явиться и с человеки пожити, чертог свят Тя, Пречистая, предуготова, подав плод безчадной Анне, слезно с супругом Своим молившейся о разрешении неплодства. Темже молим Тя, Богомати: разреши неплодие душ наших, да возможем принести Богу плоды благих дел, взывающе Ти сице: Радуйся, пресветлый чертоже безсеменнаго Божия воплощения; радуйся, одушевленная палато, в жилище всех Царя предуготованная. Радуйся, светлейший облаче, имже Седящий на Престоле Божества к нам сниде; радуйся, Посреднице закона и благодати, Ветхаго и Новаго Заветов запечатление. Радуйся, неувядаемая лозо, прекрасный цвет, Спасителя миру, произрастившая; радуйся, благовонный плоде, от неплодове

произростший и Христу благоугодно явльшийся. Радуйся, певцев Твоих благоугодны Христу представляющая; радуйся, и нас, дел благих бесплодны сущих, утешения не лишаящая. Радуйся, Пречистая Дево, Материю Спасителя мира от века предъизбранная.

## **Кондак 11-й**

Песнь хвалебную Рождеству Твоему приносящих не отрини, Владычице Благая, но рождших Тя ради, благоуветлива нам буди, молящи о нас Сына Твоего и Бога нашего, да подаст грехов прощение и жития исправление, еже в покаянии слезном выну благодарно воспеваем Ему: Аллилуиа.

## **Икос 11-й**

Светоприемная и премирная Божественного света Свеща, едиnorodная Дщерь Иоакима и Анны, предъизбранная Матерь Единороднаго Сына Божия, днесь от неплодове преславно произыде и просвещает Рождеством Своим верно празднующих и благоговейно зывающих: Радуйся, светозарная свеще, Божественным пламенем сияющая; радуйся, и нас тем благодатно согревающая и просвещающая. Радуйся, таинственная клеще, уголь Божественный, Христа Господа, во утробе и на руках Твоих носившая; радуйся, и нас в Та-

инстве Причащения приимати Того сподобляющая. Радуйся, храме Господень, Давидом воспетый, скиния благодатию возсиявшая; радуйся, кадильнице святая, рождением Сына Своего всю тварь облагоухавшая. Радуйся, престоле превознесенный, одушевленное седалище Великаго Царя, с Нимже царствующая; радуйся, Царице небесе и земли, нас, убогих, не забывающая. Радуйся, Пречистая Дево, Материю Спасителя мира от века предызбранная.

### **Кондак 12-й**

Благодати действо проявися в Рождестве Твоем, Пречистая; молитву бо безчадных родителей Твоих Господь услышав, подаде им Тя в утешение, якоже Аврааму и Сарре Исаака, восхотев таинство Своего Смотрения совершити и уготовати Тя в Матерь обетованному Искупителю, Емуже благодарно поем: Аллилуиа.

### **Икос 12-й**

Поюще славное Твое от неплодове Рождение, хвалим Тя Пречистая, яко Таинницу Божия о нас спасительнаго Смотрения, и вопием Ти сице: Радуйся, чистая Ноева Голубице, рождеством Твоим престание потопа смертнаго возвестившая; радуйся, ветвь благовестия Христова роду человеческо-

му принесшая. Радуйся, едина блаженная в женах, послушанием Твоим Богу преслушание праматери Евы исправившая; радуйся, печаль Адама и праотцев Рождеством Твоим на радость преложившая. Радуйся, яко Рождество Твое радость возвести всей вселенней; радуйся, яко о Рождестве Твоем матери радуются и неплоды веселятся. Радуйся, Рождество Твое верно и благочестно празднующих веселия сподобляющая; радуйся, с Сыном Твоим во славе Его нас спосадити Отца умоляющая. Радуйся, Пречистая Дево, Материю Спасителя мира от века предъизбранная.

### **Кондак 13-й**

Всепетая и Пречистая Мати, приими сие хвалебное пение наше, в честь преславнаго Рождества Твоего приносимое, возроди в нас желание благ вечных, и избави Церковь Святую и отечество наше от всяких бед и напастей, от врагов видимых и невидимых, и будущия изми нас муки, и Небеснаго сподоби Царствия, да во веки веков Тебе вопием к Богу: Аллилуиа.

*(Этот кондак читается трижды, затем Икос 1-й и Кондак 1-й)*

## Молитва

О Пресвятая Владычице Богородице! Призри с благосердием на моление нас грешных и смиренных рабов Твоих и умоли Бога Сына Твоего да низпослет нам и всем притекающим к Тебе здравие душевное и телесное, и вся к вечней и временней жизни потребная, да простит нам всякая согрешения вольная и невольная, да избавит нас от всяких скорбей и болезней, и напастей, и всякаго злаго обстояния. Ей, Царице наша, Преплагая, Надеждо наша несокрушимая и Заступнице необоримая! Не отврати лица Твоего от нас за множество прегрешений наших, но прости нам рuce Матерняго милосердия Твоего и сотвори с нами знамение во благо. Яви нам богатую помощь Твою и благопоспешение во всяком деле блазе, от всякаго же начинания греховнаго и помышления лукаваго отврати нас, да всегда славим пречестное имя Твое и, благодарне Рождеству Твоему поклоняющеся, величаем Бога Отца, и Единороднаго Сына Его, Господа нашего Иисуса Христа, и Святаго Духа, со всеми святыми, во веки веков. Аминь.

# **Акафист Честному и Животворящему Кресту Господню (Воздвижение Креста Господня 27 сентября)**

## **Кондак 1-й**

Приидите, христоименитии людие, составим похвалу Честному Кресту, на немже Христос, Царь Славы, руке распростер, возведе нас на первое блаженство, из негоже низпадохом прелестию змиевою. Ты же, о Пресвятый Кресте, яко имеяй присущую тебе силу Распятаго Христа, спасай и сохраняй от всяких бед любовно зовущия ти: Радуйся, Честный Кресте, всерадостное знамение нашего искупления.

## **Икос 1-й**

Ангелов лица, яко Божии служителие, Крест обстоюще, вольную страсть Христа Жизнодавца прославляют. Мы же страданьми Того вечныя смерти избавльшеся, подражая горним Силам, радостно взываем: Радуйся, Кресте, яко на тебе Христос Бог наш, волею руке распростер, спасение наше со-

дела; радуйся, яко распростершимся на тебе Христом преступление Адама и Евы, простерших руце ко древу запрещенному, упразднися. Радуйся, яко воздвижену бывшу на тебе, аки преступну, Законодавцу, древняя клятва, яже на нас бывшая, потребися; радуйся, яко содеявшимся на тебе, странным таинством род человеческий от тли смертныя свободися. Радуйся, яко Пострадавшим и Умершим на тебе жало смерти сокрушися; радуйся, того ради страданиями Бог с человеки примирися. Радуйся, Честный Кресте, всерадостное знамение нашего искупления.

## **Кондак 2-й**

Видя падших человеков, Господи, Ты вочеловечився, крест и смерть вольно плотию претерпел еси за род наш, да от смерти вечныя избавиши исповедающия Тя, Сына Божия и вопиющия Ти: Аллилуиа.

## **Икос 2-й**

Разум человекъ изнемогает в постижении велия тайны Твоего, Христе, воплощения и вольнаго за ны страдания: како Ты, Бог сый безстрастный, страсть крестную, яко человек, претерпел еси и сие орудие смерти Твоя соделал еси источником жизни и спасения всем благочестно в Тя веру-

ющим и хвалебно воспевающим: Радуйся, Кресте, на немже содеяся таинство, от века предопределенное; радуйся, яко на тебе совершился наше искупление, многообразне во образех и сенех предъявленное. Радуйся, яко умерый на тебе Жизнодавец, Кровь и воду источи, имиже грехи наша омываются; радуйся, яко каплями Святейшей Крове Его греховныя струпы душ наших очищаются. Радуйся, Кресте, якоже древо животное, еже есть посреде рая Божия, христианом вожделенный; радуйся, плодами безсмертия умно нас питающий и надеждою жизни вечныя малодушие наше ободряющий. Радуйся, Честный Кресте, всерадостное знамение нашего искупления.

### **Кондак 3-й**

Крест Твой, аще и древо видимо есть существом, но Божественною одеяно есть силою, и чувственное миро выявляемо, умно наше чудотворит спасение, подвизая пети Тебе: Аллилуиа.

### **Икос 3-й**

Имуще пред очима нашими Крест Пресвятый, святолепным поклонением той почитаем распеншагося ради на нем Спаса Христа, и, лобызая, взываем: Радуйся, Кресте, про-

славленный послушанием и страданием Христовым; радуйся, возвеличенный возвышением на тебе Сына Божия, Иже весь мир от падения Адамля воздвиже. Радуйся, яко сбывшагося на тебе ужаснаго таинства земли ужасеся и вострепета, аки бы хотящи поглотити законопреступныя; радуйся, яко заклавшуюся на тебе Агнцу Божию завеса храма раздразя и жертва ветхозаветная упразднися. Радуйся, Кресте, яко распавшуюся под тобою камню, каменносердечнии роди еврейстии неверием от Бога отпадоша, благодати же священства и царства лишишася; радуйся, яко омрачившуся солнцу в страсти Христовой ночь многобожия преиде и свет веры возсия. Радуйся, Честный Кресте, всерадостное знамение нашего искупления.

### **Кондак 4-й**

Бурею злобы дышуще и завистию движими, первосвященницы иудейстии скрыта в землю Крест Твой, Христе Боже, да не будет обличением безумие их; но той, яко сокровище драгое, из недр земли возсия, тщанием благочестивыя царицы Елены обретенный и на радость всему миру явленный, с богокрасною песнию: Аллилуиа.

## **Икос 4-й**

Видевше тогда христианстии людие Честнаго Креста обречение, прославляху распеншагося на нем Христа Бога: Господи, помилуй, взывающе. Мы же ныне, подражающе им, прославляем Крест Его Святый хваленьми сицевыми: Радуйся, Кресте, в землю сокровенный и оскверненное грехами наше естество земное освятивый; радуйся, явлением своим из недр земных хулителей воплощения и Божества Христова посрамивый. Радуйся, яко Пострадавый на тебе плотию прия всяку власть на небеси и на земли, да всех и вся к Богу Отцу приведет; радуйся, яко Умерый на тебе яко человек силою Божества Своего сокруши заклёпы ада и изведе оттуда души праведных. Радуйся, Кресте, яко разбойник благоразумный, Христу сраспявыйся, Того исповедавый, тобою, аки лестницею, на небеса взыде; радуйся, яко и всех отсечением страстей Христу сраспинающихся возводиши в Царствие Небесное. Радуйся, Честный Кресте, всерадостное знамение нашего искупления.

## **Кондак 5-й**

Господи, при Моисее иногда пророце точию образ Креста Твоего являем побеждаше врази Твоя, ныне же самый Крест

Твой имущее, помощи просим: укрепи Церковь Твою и даруй ей победы на враги, да расточатся вси врази Твои, не вопиющие Ти: Аллилуиа.

## **Икос 5-й**

Честнаго Креста, Христе, действо прообразив Амалика в пустыне Синайстей: егда бо простираше руце, креста образ творя, укрепляхуся людие; ныне же все вещей сбытие в нас исполнися: днесь крест воздвизается, и демони бегают, днесь тварь вся от тли свободися, яко вся Креста ради возсияши нам дарования. Темже, радующеся, вопием: Радуйся, Кресте, оружие Христово страшное, егоже демони трепещут; радуйся, яко силою на тебе Распятаго Христа бесовстии полчища далече прогоняются. Радуйся, яко силою действующия в тебе Божественная благодати победы на сопротивная христоролюбивым людем даруются; радуйся, яко от тебе, яко высокоросленнаго и многоплодовитаго древа Христова на тебе страдания, плоды жизни и спасения нам произрастают. Радуйся, Честный Кресте, всерадостное знамение нашего искупления.

## **Кондак 6-й**

Проповедником силы и Божества Христова явися иногда

животворящее древо Крестное, егда прикосновением своим воскреси мертваго и к жизни возведе его, еже видевше, мнози от иудей и язычников познаша велию благочестия тайну: яко спасения ради человеческого, Бог во плоти явился и страсть крестную претерпе, да спасет вопиющая Ему: Аллилуиа.

## **Икос 6-й**

Якоже древо райское превелие, возвысися на Голгофе Честный Крест Христов, отонудуже во всю вселенную распростре мысленный ветви благодати и Распеншагося на нем: под егоже сению обретают прохладу палимии зноем страстей и хотящий благочестно жити о Христе Иисусе. Темже и мы, благодати Того причастницы, весело взываем: Радуйся, святыи Кресте, древом жизни, Адама ради в Едеме насажденным, преображенный; радуйся, новым Адамом, руце на тебе распростершим, миру явленный. Радуйся, яко под сень благодатнаго защищения твоего вси вернии прибегают; радуйся, яко милосердием Даровавшаго нам тебе кающийся грешницы огня геенскаго избегают. Радуйся, Кресте, утешение наше в скорбех и печалех; радуйся, живительная отрадо и помощь изнемогающим в борьбе с прилогами страстей, мира и диавола. Радуйся, Честный Кресте, всерадостное знамение нашего искупления.

## Кондак 7-й

Хотя явити роду человеческому благодсти и милосердия Своего неизследимую пучину, Крест Твой, Господи, дал еси нам тверда блюстителю и прогонителю демонов. Темже вси мы, иже в Тя верующии, прославляем величие страсти Твоея, благодарно поюще Тебе: Аллилуиа.

## Икос 7-й

Дивны дела явил еси, Господи, Крестом Твоим Честным: распеншуся бо Ти на том плотию, вся тварь изменися: солнце лучи своя сокры, основания земли восколебахуся, ад сокрушися державою власти Твоея и изведе юзники, яже от века содержал ест. Сего ради увязаем той сими песенными цветы: Радуйся, Кресте, яко пострадавшему на Тебе вся тварь сострадаше, яко Творцу своему и Владыце; радуйся, яко силу Того и Божество свидетельствовоаху солнце помрачением и земля колебанием. Радуйся, яко Умерый на тебе не удержан бысть в мертвых, но, разрушив державу смерти, в третий день воскресе; радуйся, яко воскресшу Тому проповедь евангельская, от лика апостольскаго наченшаяся, во вся концы земли изыде. Радуйся, Кресте, яко тобою кумиролужение и многобожие языческое упразднися; радуйся, яко

тебе ради правая вера во Единого Бога, в Троице славимаго,  
по всей земли утвердися. Радуйся, Честный Кресте, всера-  
достное знамение нашего искупления.

# Конец ознакомительного фрагмента.

Текст предоставлен ООО «ЛитРес».

Прочитайте эту книгу целиком, [купив полную легальную версию](#) на ЛитРес.

Безопасно оплатить книгу можно банковской картой Visa, MasterCard, Maestro, со счета мобильного телефона, с платежного терминала, в салоне МТС или Связной, через PayPal, WebMoney, Яндекс.Деньги, QIWI Кошелек, бонусными картами или другим удобным Вам способом.